



Handwritten initials or mark in the top right corner.

Broj: 13-04/2-34-2912/18
Sarajevo, 04.05.2018. godine

Ministarstvo za rad, socijalnu politiku, raseljena lica i izbjeglice Kantona Sarajevo, ulica Reisa Džemaludina Čauševića br. 1, na osnovu člana 200. Zakona o upravnom postupku ("Službene novine Federacije Bosne i Hercegovine", br. 2/98 i 48/99), a u vezi sa članom 130. Zakona o radu ("Službene novine Federacije Bosne i Hercegovine", broj: 26/16), u predmetu utvrđivanja reprezentativnosti sindikata, a po zahtjevu Udruženja "Sindikata Univerziteta u Sarajevu" donosi

R J E Š E N J E

UTVRĐUJE SE reprezentativnost Udruženja "Sindikata Univerziteta u Sarajevu", za područje djelatnosti visokog obrazovanja na području Kantona Sarajevo.

Obrazloženje

Ministarstvu za rad, socijalnu politiku, raseljena lica i izbjeglice Kantona Sarajevo (u daljem tekstu: Ministarstvo), dana 06.03.2018. godine, obratilo se Udruženje "Sindikata Univerziteta u Sarajevu" (u daljem tekstu: Sindikat SUNSA) aktom broj: 01-03/18 od 06.03.2017. godine kojim se zahtjeva pokretanje postupka utvrđivanja reprezentativnosti Sindikata SUNSA za oblast visokog obrazovanja na području Kantona Sarajevo, a u skladu sa članom 130. Zakona o radu ("Službene novine Federacije Bosne i Hercegovine", broj: 26/16) (u daljem tekstu: Zakon o radu). U zahtjevu je navedeno da Sindikat SUNSA ispunjava Zakonom o radu tražene uslove za reprezentativnost, definirane članom 130. ovog Zakona. Također je navedeno da Sindikat SUNSA ima ukupno 1052 člana, zaposlena na petnaest fakulteta Univerziteta u Sarajevu, na kojima u organizirane osnovne sindikalne organizacije unutar Sindikata SUNSA kao pravnog lica. Uz zahtjev je priložena sljedeća dokumentacija: Rješenje Ministarstva pravde i uprave Kantona Sarajevo o upisu u registar udruženja koje se vodi u ovom ministarstvu broj: 03-05-05-12573/06 od 27.12.2016. godine (ovjerena kopija), Rješenje o izmjeni Rješenja 03-05-05-12573/06 od 27.12.2016 broj: 03-03-05-14665/17 od 17.11.2017. godine (ovjerena kopija), Izjava o načinu finansiranja Sindikata SUNSA broj: 02-03/18 od 06.03.2018. godine, potpisana od strane predsjednika Sindikata red.prof.dr.sc. Jasmin Velagić, ovjerena pečatom Sindikata SUNSA (original), Spisak članova Sindikata SUNSA, ovjeren pečatom Sindikata SUNSA (original), Spisak članova Sindikata SUNSA sa dokazom plaćanja članarine i to za članove uposlene na sljedećim organizacionim jedinicama Univerziteta u Sarajevu (u daljem tekstu: Univerzitet): Akademija likovnih umjetnosti Sarajevo (original), Fakultet političkih nauka (original), Elektrotehnički fakultet (original), Fakultet za kriminalistiku, kriminologiju i sigurnosne studije (original), Fakultet zdravstvenih studija (original), Farmaceutski fakultet (original), Filozofski fakultet (original), Mašinski fakultet (original), Medicinski fakultet (original), Muzička akademija (original), Pedagoški fakultet (original), Poljoprivredno-prehrambeni fakultet (original), Prirodno-matematički fakultet (original), Šumarski fakultet (original), Veterinarski fakultet (original).



Ministarstvo je u skladu sa članom 130. stav (2) Zakona o radu uputilo akt Ministarstvu obrazovanja, nauke i mladih Kantona Sarajevo broj: 13-04/2-34-2912/18 od 14.03.2018. godine, kojim je zatraženo da dostavi informaciju da li raspolaže podatkom o broju zaposlenih u oblasti visokog obrazovanja na području Kantona Sarajevo, odnosno ako nemaju tražene podatke da dostave informaciju od koje institucije se ista može dobiti. Također isti podaci su zatraženi i od Federalnog zavoda za statistiku, Služba za statistiku za područje Kantona Sarajevo.

Federalni zavod za statistiku aktom broj: 06-32.9-369/18 od 21.03.2018 informisao je Ministarstvo, da je prema posljednjim objavljenim podacima ovog Zavoda, a koji se odnose na mjesec decembar 2017. godine, broj zaposlenih u djelatnosti visokog obrazovanja u Kantonu Sarajevo 2716. Aktom broj: 11-05-38-sl/18 od 21.03.2018. godine Ministarstvo je informisano od strane Ministarstva za obrazovanje, nauku i mlade Kantona Sarajevo da isto ne raspolaže traženim podacima, ali da se precizni i potpuni podaci o broju uposlenih na Univerzitetu u Sarajevu mogu dobiti od:

- Rektorata Univerziteta u Sarajevu koji bi trebao da posjeduje jedinstvenu bazu podataka o svim uposlenicima na Univerzitetu u Sarajevu i njegovim organizacionim jedinicama ili
- pojedinačno svakog fakulteta, akademije i naučnoistraživačkog instituta kao organizacionih jedinica Univerziteta u Sarajevu.

U vezi sa gore navedenim aktom, Ministarstvo se dana 03.04.2018. godine, aktom broj: 13-04/02-34-2912/18, obratilo Rektoratu Univerziteta u Sarajevu sa zahtjevom za dostavu informacije o broju uposlenih u oblasti visokog obrazovanja na području Kantona Sarajevo, odnosno na Univerzitetu u Sarajevu. Aktom broj: 0101-2259/18 od 10.04.2018. godine Rektorat Univerziteta u Sarajevu informisao je Ministarstvo da je broj uposlenih na Univerzitetu u Sarajevu 2607, sa danom 31.01.2018. godine. Također Rektorat u svome aktu navodi da ne raspolaže podacima o broju uposlenih u oblasti visokog obrazovanja na području Kantona Sarajevo.

Na osnovu provedenog postupka po zahtjevu Sindikata SUNSA i dokumentacije iz spisa, cijeneći sve izvedene dokaze, Ministarstvo za rad, socijalnu politiku, raseljena lica i izbjeglice Kantona Sarajevo je utvrdio sljedeće pravnorelevantno činjenično stanje, koje je od važnosti za donošenje zakonitog i pravilnog rješenja.

Iz Rješenja Ministarstva pravde i uprave Kantona Sarajevo, broj: 03-05-05-12573/06 od 27.12.2006. godine proizilazi da je Udruženje "Sindikat Univerziteta u Sarajevu", skraćeni naziv Sindikat SUNSA, sa sjedištem u Sarajevu u ulici Vilsonovo šetalište br. 9., dana 27.12.2006. godine upisan u registar udruženja koji se vodi kod ovog Ministarstva pod registarskim brojem 976. knjiga II registra udruženja. Lica ovlaštena za zastupanje i predstavljanje su: Berko Zečević - predsjednik Sindikata i Uzeir Bavčić – potpredsjednik Sindikata.

Rješenjem Ministarstva pravde i uprave Kantona Sarajevo broj: 03-03-05-14665/17 od 17.11.2017. godine, izmijenjeno je Rješenje navedenog Ministarstva broj: 03-05-05-12573/06 od 27.12.2006. godine, u dijelu koji se odnosi na zastupanje i predstavljanje, na način da su lica ovlaštena za zastupanje i predstavljanje: Jasmin Velagić - predsjednik Sindikata i Jasmin Terzić – potpredsjednik Sindikata.

U izjavi o načinu finansiranja Sindikata SUNSA broj: 02-03/18 od 06.03.2018. godine, koja je ovjerena pečatom Sindikata SUNSA i potpisom od strane predsjednika Sindikata, navedeno je da se Sindikat SUNSA finansira isključivo od članarina svojih članova, odnosno osnovnih sindikalnih organizacija organizacionih jedinica Univerziteta.

Iz spiska članova Sindikata vidljivo je da Sindikat broji ukupno 1052 člana koji uredno plaćaju članarinu, što je vidljivo i iz ovjerenih spiskova svake organizacione jedinice Univerziteta u Sarajevu.



U skladu sa članom 130. Zakona o radu, Ministarstvo je pribavilo službenim putem podatke Federalnog zavoda za statistiku, koji je u aktu broj: 06-32.9-369/18 od 21.03.2018. godine naveo da je prema posljednjim objavljenim podacima ovog Zavoda, a koji se odnose na mjesec decembar 2017. godine, broj zaposlenih u djelatnosti visokog obrazovanja u Kantonu Sarajevo 2716.

Također, u skladu sa gore navedenim članom Zakona o radu, Ministarstvo je pribavilo službenim putem podatke Rektorata Univerziteta u Sarajevu, koje je u aktu broj: 0101-2259/18 od 10.04.2018. godine, naveo da je broj uposlenih na Univerzitetu u Sarajevu 2607, te da Rektorat ne raspolaže sa podacima o broju uposlenih u oblasti visokog obrazovanja na području Kantona Sarajevo.

U skladu sa članom 122. Zakona o radu sindikat se smatra reprezentativnim ako je registrovan kod nadležnog organa, u skladu sa zakonom, ako se finansira pretežno iz članarina i ako ima potreban procenat učlanjenosti zaposlenika, u skladu sa ovim zakonom. Članom 124. Zakona o radu reprezentativnim sindikatom za jedno ili više područja djelatnosti smatra se sindikat koji, pored uslova iz člana 122. ovog zakona, ispunjava i uslov da ima najmanje 30% članova od ukupnog broja zaposlenih u području djelatnosti na području Kantona.

Ovo ministarstvo, postupajući po zahtjevu Sindikata SUNSA, je na osnovu savjesne i brižljive ocjene svakog dokaza posebno i svih dokaza zajedno, kao i na osnovu rezultata cjelokupnog postupka, utvrdilo da je Sindikat Univerziteta u Sarajevu registrovan u skladu sa zakonom kod nadležnog organa, odnosno Ministarstva pravde i uprave Kantona Sarajevo, da djeluje na području Kantona Sarajevo, da se isti finansira od prihoda iz članarine članova ovog sindikata, te da je broj članova Sindikata Univerziteta u Sarajevu 1052 člana, što predstavlja procenat od 38,73 % od ukupnog broja zaposlenih u djelatnosti visokog obrazovanja u Kantonu Sarajevo (2716).

Stoga je na osnovu utvrđenog činjeničnog stanja, primjenjujući čl. 122., 124. i 130. Zakona o radu i imajući u vidu da su ispunjeni svi zakonski uslovi, zaključeno da je Udruženje "Sindikat Univerziteta u Sarajevu" reprezentativan za područje djelatnosti "visokog obrazovanja" na području Kantona Sarajevo, te je shodno članu 200. Zakona o upravnom postupku, riješeno kao u dispozitivu ovog rješenja.

Uputstvo o pravnom lijeku: Protiv ovog rješenja nije dozvoljena žalba, ali se može pokrenuti upravni spor kod Kantonalnog suda u Sarajevu, u roku od 30 dana od dana dostavljanja rješenja.

Pripremio: Zoran Timarac, šef Odjeljenja



Dostaviti:

1. Udruženje "Sindikat Univerziteta u Sarajevu",
ul. Vilsonovo šetalište broj 9, 71000 Sarajevo
2. a/a



web: <http://mrsri.ks.gov.ba>
e-mail: mrsri@mrsri.ks.gov.ba
Tel: + 387 (0) 33 562-089, Fax: + 387 (0) 33 562-090
Sarajevo, Reisa Džemaludina Čauševića 1

